

**KANTONALNO JAVNO KOMUNALNO  
PREDUZEĆE „RAD“ D.O.O. SARAJEVO**

**PRAVILNIK O FORMIRANJU CIJENA PRIKUPLJANJA, ODVOZA I  
DEPONOVANJA KUĆNOG OTPADA ZA PRAVNA I FIZIČKA LICA  
NA PODRUČJU KANTONA SARAJEVO**

Sarajevo, juli 2025. godine

Na osnovu člana 22. stav (1) Zakona o komunalnoj djelatnosti („Službene novine Kantona Sarajevo“ br. 14/16, 43/16, 10/17, 19/17, 20/18 i 22/19), Zakona o komunalnoj čistoći („Službene novine Kantona Sarajevo“, br. 14/2016, 43/2016, 19/2017, 20/2018 i 22/2019), člana 84. stav (1) i stav (3) Statuta KJKP „RAD“ d.o.o. Sarajevo – Prečišćeni tekst broj 1498/23 od 20.01.2023. godine, Odluke o izmjeni Statuta KJKP „RAD“ d.o.o. Sarajevo broj 12375/24 od 01.10.2024. godine, a na prijedlog Uprave Preduzeća Zaključak, broj: 01-7576/25 od 18.06.2025. godine, Nadzorni odbor Preduzeća donosi:

**P R A V I L N I K**  
**o formiranju cijena prikupljanja, odvoza i deponovanja kućnog otpada za pravna i fizička lica na području Kantona Sarajevo**

**I. OPĆE ODREDBE**

**Član 1.**  
**(Predmet Pravilnika)**

Ovim Pravilnikom uređuje se uslovi i način formiranja cijena usluga prikupljanja, odvoza i deponovanja kućnog otpada za pravna i fizička lica na području Kantona Sarajevo, pojam otpada i obveznici plaćanja usluga.

**Član 2.**  
**(Pojam prikupljanja, odvoza i deponovanja otpada)**

(1) Pod kućnim otpadom u skladu sa Zakonom o komunalnoj čistoći podrazumijeva se:

- a) kućni otpad koji nastaje kao posljedica dnevnog življenja u stanovima (otpaci hrane, prašina, krpe, sitna ambalaža, pepeo, čađ i slično), kao i drugi otpaci koji se stvaraju u dvorištima, u zajedničkim prostorijama stambenih zgrada (hodnici, stubišta i sl.), garažama i šupama,
- b) kućni otpad koji nastaje u poslovnim zgradama i prostorijama, a nije proizvod redovne djelatnosti koja se obavlja u tim zgradama i prostorijama;
- c) kabasti otpad kao: stari namještaj, aparati za domaćinstvo, kartonska, limena i drvena ambalaža i druge glomazne stvari.

(2) Pod prikupljanjem otpada podrazumijeva se organizovano sakupljanje otpada iz specijaliziranih posuda za prikupljanje otpada koje su postavljene na određenim lokacijama na području Kantona Sarajevo, a sve u skladu sa Zakonom o komunalnoj čistoći i Operativnim planom i programom odvoza otpada.

(3) Odvoz otpada podrazumijeva transport otpada specijaliziranim vozilama sa mjesta predviđenih za odlaganje otpada do lokacija za odlaganje ili dalju obradu otpada.

(4) Pod deponovanjem otpada podrazumijeva se trajno odlaganje otpada na posebno uređenu lokaciju.

### **Član 3. (Obveznici plaćanja)**

- (1) Usluge prikupljanja, odvođenja i deponovanja otpadaka iz stambenih zgrada i stanova plaćaju, po utvrđenoj cijeni, korisnici stambenog prostora.
- (2) Usluge prikupljanja, odvođenja i deponovanja otpadaka iz poslovnih zgrada i prostorija plaćaju, po utvrđenoj cijeni, korisnici tih zgrada i prostorija.
- (3) Korisnikom prostora smatra se lice koje je vlasnik prostorije, ili lice koje po drugom osnovu (npr. Ugovor o zakupu) koristi prostor, odnosno lice koje se nalazi u posjedu prostora po drugom pravnom osnovu.
- (4) Usluge prikupljanja, odvođenja i deponovanja otpadaka iz garaža plaćaju, po utvrđenoj cijeni, korisnici prostora.

## **II. CIJENE USLUGA**

### **Član 4. (Osnovica utvrđivanja cijene usluga)**

- (1) Osnovica za utvrđivanje visine cijene usluga je kvadratni metar (m<sup>2</sup>) korisne izgrađene površine.
- (2) Pod korisnom izgrađenom površinom smatra se ukupna površina stambenog objekta fizičkog lica odnosno objekta poslovnog subjekta koji obavlja određenu djelatnost koja je upisana u sudski registar.
- (3) Za cijene usluga pravnih lica, ili lica koja obavljaju poslovnu djelatnost a nemaju status pravnih lica (npr. ugostiteljska djelatnost, obrt i srodne djelatnosti, frizerski i kozmetički saloni, zanatske djelatnosti i dr.), primjenjuju se diferencirane cijene zavisno od vrste djelatnosti koje se obavljaju u zgradama i prostorijama.

### **Član 5. (Cijena komunalnih usluga)**

- (1) Visinu cijene i način plaćanja komunalne usluge utvrđuje KJKP "RAD" d.o.o. Sarajevo (u daljem tekstu: Davalac usluge), na temelju detaljne kalkulacije, a u skladu sa članom 6. ovog Pravilnika.
- (2) Cijena komunalne usluge sadrži sve troškove tekućeg održavanja i funkcionisanja komunalnog sistema na koji se odnosi, u skladu sa članom 37. Zakona o komunalnim djelatnostima KS.
- (3) U cijenu komunalne usluge uključena je amortizacija, koja se sastoji iz amortizacije stalnih sredstava davaoca komunalne usluge i amortizacije stalnih sredstava infrastrukturnog komunalnog sistema, odnosno dobara u općoj upotrebi.
- (4) Davalac komunalne usluge amortizaciju koristi za obnavljanje stalnih sredstava, a dio amortizacije stalnih sredstava infrastrukturnog komunalnog sistema, odnosno dobara u općoj upotrebi prema programu na koji saglasnost daje Vlada Kantona.
- (5) Validnost kalkulacije i konačan prijedlog visine cijene komunalnih usluga utvrđuje i usvaja Vlada Kantona u skladu sa nadležnostima.
- (6) Cijena komunalne usluge za pruženu komunalnu uslugu plaća se davaocu komunalne usluge.

### III POSTUPAK FORMIRANJA CIJENA

#### Član 6. (Način formiranja cijene usluga)

(1) Cijena usluge prikupljanja, odvoza i deponovanja otpada za fizička lica formira se na osnovu utvrđene korisne površine izgrađenog prostora (m<sup>2</sup>), u skladu sa članom 4. ovog Pravilnika i utvrđenog metodološkog okvira za obračun cijene. Metodološki okvir za obračun cijene čini odnos između pripadajućeg dijela troškova koji se odnose na prikupljanje, odvoz i deponovanja otpada i utvrđene korisne površine izgrađenog prostora (m<sup>2</sup>).

(2) Cijena usluge prikupljanja, odvoza i deponovanja otpada za pravna lica formira se na osnovu utvrđene korisne površine prostora, vrste djelatnosti koje se obavljaju u zgradama i prostorijama u skladu sa članom 4. ovog Pravilnika i utvrđenog metodološkog okvira za obračun cijene, a koji zavisi od količine proizvedenog otpada, učestalosti odvoza i vrste otpada.

(3) Kako bi se što tačnije i korektnije odredila cijena usluge po m<sup>2</sup> prikupljanja, odvoza i deponovanja otpada po djelatnosti odnosno krajnjoj namjeni objekta, isti su svrstani u slične kategorije.

(4) Cijene za pravna lica koje se odnose na ljetne bašte i kioske formirane su na osnovu cijene koštanja usluge po šifri djelatnosti pomnožene sa m<sup>2</sup> izgrađene korisne površine prostora.

(5) Cijene za ljetne bašte obračunavaju se u periodu od maja do septembra.

(6) Metodološki okvir prilikom obračuna cijene usluga Preduzeća postavljen je na slijedeći način :

- (a) Na osnovu evidencije koja se koristi u procesu prikupljanja, odvoza i deponovanja otpada i njihove nabavne cijene vrši se izračun troškova amortizacije i održavanja,
- (b) Na bazi računovodstvene evidencije troškova, utvrđuju se svi troškovi materijala i usluga koji se odnose na proces prikupljanja, odvoza i deponovanja otpada
- (c) Utvrđuje se broj direktnih radnika koji rade na prikupljanju, odvozu i deponovanju otpada, struktura tih radnika prema sistematizaciji radnih mjesta. Bruto troškovi direktno angažovane radne snage utvrđuju se prema važećem Pravilniku o radu.
- (d) Na direktne troškove (rada, materijala i usluga, troškova amortizacije i investicionog održavanja) dodaje se alikvotni dio indirektnih troškova koji se utvrđuje prema učešću direktno angažovanih radnika na prikupljanju, odvozu i deponovanju otpada u ukupnom broju zaposlenih u KJKP "RAD" d.o.o. Sarajevo
- (e) Ukupni troškovi (direktni i indirektni) koji nastaju u procesu prikupljanja, odvoza i deponovanja otpada alociraju se na dvije grupe korisnika – fizička i pravna lica – prema učešću u ukupnoj količini otpada koju produciraju.
- (f) Za fizička lica utvrđuje se jedinstvena cijena. Cijena se utvrđuje po kvadratnom metru stambene površine i to na način da se ukupni alocirani troškovi za ovu kategoriju korisnika podijele sa ukupnom korisnom površinom stambenog prostora. Na troškove po jednom kvadratnom metru dodaje se PDV.
- (g) Za pravna lica utvrđuje se diferencirana cijena za različite djelatnosti u zavisnosti od količine produciranog otpada, učestalosti odvoza i vrste otpada. Cijena se utvrđuje po kvadratnom metru korisne površine.
- (h) Na zbirni trošak dodaje se PDV.

(7) Nakon formiranja cijena, Uprava Preduzeća, Nadzornom odboru upućuje prijedlog cijena prikupljanja, odvoza i deponovanja kućnog otpada na području Kantona Sarajevo, koje Nadzorni odbor usvaja i šalje Vladi Kantona Sarajevo (u daljem tekstu: Osnivač) na saglasnost.

(8) Cijene usluga prikupljanja, odvoza i deponovanja otpada se primjenjuju nakon dobijanja saglasnosti od strane Osnivača na Prijedlog cjenovnika.

(9) Pri formiranju cijena neće se vršiti dogovor sa drugim pravnim i fizičkim licima, koristiti monopolski položaj, niti druga pravna i fizička lica dovoditi u nepovoljan položaj.

## IV PRIMJENA CIJENE USLUGA

### Član 7. (Primjena cijene usluga)

(1) Po formiranju cijena usluga u skladu sa članom 6. Stav (1) ovog Pravilnika, a po dobijenoj saglasnosti Osnivača primjenjivat će se cijene prema Klasifikaciji djelatnosti iz 2010. godine kako slijedi:

Grupa	Pravna lica Djelatnosti u skladu sa Klasifikacijom djelatnosti iz 2010. godine
1	O Javna uprava i obrana,obvezno socijalno osiguranje P Obrazovanje Q Djelatnosti zdravstvene i socijalne zaštite 86.1 Djelatnosti bolnica 88 Djelatnosti socijalne zaštite bez smještaja R Umjetnost, zabava i rekreacija 90 Kreativne, umjetničke i zabavne djelatnosti 93 Zabavne i rekreacijske djelatnosti 94 Djelatnosti članskih organizacija
2	A Poljoprivreda, šumarstvo i ribolov – sve djelatnosti B Vađenje ruda i kamena – sve djelatnosti C Ostale djelatnosti iz domena prerađivačke industrije – izuzev 10.1 i 10.2 D Proizvodnja i snadbjevanje električnom energijom , plinom,parom I klimatizacija 36.0 Sakupljanje, pročišćavanje i snabdijevanje vodom 37.0 Uklanjanje otpadnih voda 47.5 Trgovina na malo ostalom opremom za domaćinstvo u specijaliziranim prodavnicama J Informacije I komunikacije K Financijske djelatnosti I djelatnosti osiguranja L Poslovanje nekretninama M Stručne, naučne I tehničke djelatnosti N Administrativne I pomoćne uslužne djelatnosti
3	38.0 Sakupljanje otpada, djelatnosti obrade i zbrinjavanja otpada; reciklaža materijala 39.0 Djelatnosti sanacije okoliša te ostale djelatnosti upravljanja otpadom F Građevinarstvo 53 Poštanske i kurirske djelatnosti 55 Smještaj 86.2 Djelatnosti medicinske i stomatološke prakse 86.9 Ostale djelatnosti zdravstvene zaštite 87 Djelatnosti socijalne zaštite u ustanovama sa smještajem 96.03 Pogrebne i srodne djelatnost 49 Kopneni prijevoz i cjevovodni transport
4	10.1. Prerada i konzerviranje mesa i proizvodnja mesnih proizvoda (10.11-10.13) 10.2 Prerada i konzerviranje riba, ljuskara i mekušaca (10.20) 45.2 Održavanje i popravak motornih vozila

	45.3 Trgovina dijelovima i priborom za motorna vozila 47.7 Trgovina na malo ostalom robom u specijaliziranim prodavnicama 52 Skladištenje i pomoćne djelatnosti u prijevozu 92 Djelatnosti kockanja i klađenja 95 Popravak računara i predmeta za ličnu upotrebu i domaćinstvo 96 Ostale lične uslužne djelatnosti 51 Zračni prijevoz
5	47.1 Trgovina na malo u nespecijaliziranim prodavnicama 47.2 Trgovina na malo hranom, pićima i duhanskim proizvodima u specijaliziranim prodavnicama 47.3 Trgovina na malo motornim gorivima u specijaliziranim prodavnicama 50 Zračni prijevoz
6	47.22 Trgovina na malo mesom i mesnim proizvodima u specijaliziranim prodavnicama 47.23 Trgovina na malo ribama, ljuskarima i mekušcima u specijaliziranim prodavnicama 56 Djelatnosti pripreme i usluživanja hrane i pića
7	Kiosci –cijene koštanja usluge po šifri djelatnosti pomnožene sa m2 izgrađene korisne površine prostora
8	Ljetne bašte – cijene koštanja usluge po šifri djelatnosti pomnožene sa m2 izgrađene korisne površine prostora. Cijene za ljetne bašte obračunavaju se u periodu od maja do septembra.

Grupa	FIZIČKA LICA
1	Fizička lica

(2)Na formirane cijene usluga prikupljanja, odvoza i deponovanja kućnog otpada za pravna lica i fizička lica dodatno se obračunava PDV (porez na dodatnu vrijednost) od 17% .

(3)Ukoliko pravno lice obavlja djelatnost koja je iskazana kao podšifra jedne od glavnih djelatnosti po Klasifikaciji djelatnosti iz 2010. godine, smatrat će se da se data djelatnost svrstava pod glavnu šifru djelatnosti iskazanu kroz gore navedenu tabelu.

## V PROMJENA CIJENE USLUGA

### Član 8. (Promjena cijena usluga)

(1) Rekalkulacija cijene usluga prikupljanja, odvoza i deponovanja otpada za fizička i pravna lica vrši se u slučaju izmjene nekog od parametara cijena (radne snage, normativa, cijene pojedinačnih materijala ili eksternih usluga).

(2) Cijene usluga se mogu mijenjati isključivo na način na koji se i donose.

## VI ZAVRŠNE ODREDBE

### Član 9.


Preduzeće je dužno pridržavati se utvrđenih cijena usluga, te Cjenovnik usluga učiniti javno dostupnim korisnicima usluga.

### Član 10.

Na sve što u pogledu cijena usluga, nije regulisano ovom Pravilnikom, primjenjuju se odredbe važećih propisa.


### Član 11.

Izmjene i dopune Pravilnika vrše se po istoj proceduri kako je donesen. Ovaj Pravilnik stupa na snagu osmog dana od dana objavljivanja na oglasnoj tabli Preduzeća.

Predsjednik Nadzornog odbora  
[REDACTED]  
Muhidin Čardaković, dipl. pravnik

Broj: 2221 /25  
Datum: 02.07 25

Da je Pravilnik o formiranju cijena prikupljanja, odvoza i deponovanja kućnog otpada objavljen na oglasnoj ploči KJKP „RAD“ d.o.o. Sarajevo dana 02.07.2025 godine, ovjerava

  
\_\_\_\_\_